

### Tus Mob Anthrax zoo li cas?

Tus mob Anthrax yog ib tug mob ua mob sai thiab sib kis tau yooj yim heev. Tus kab mob yog hom kab mob Bacterium hu ua Bacillus anthracis. Tus mob Anthrax no feem ntau raug rau tej tsiaj txhu xwb, tab sis, kuj yuav kis tau rau neeg thiab.

### Tus mob Anthrax tshwm sim heev li cas thiab leej twg thiab yuav raug tau?

Tus mob Anthrax no feem ntau muaj tshwm sim rau tej cheeb tsam ua liaj ua teb uas muaj rau tej tsiaj txhu. Tsis tas li, kuj pom tias tus mob Anthrax no kuj muaj tshwm thooob ntuj, thiab pom muaj rau cov teb chaws uas tsis muaj kev soj ntsuam txog pej xeeb thiab tsiaj txhu tej kev noj qab haus huv zoo. Tej qhov chaw uas pom tias ntxim yuav muaj tus mob no mas yog cov teb chaws nyob sab ntuj As Mes Lis Kas nruab nrab mus rau qab teb, nyob rau cov teb chaws Yus Laus (Europe) cheeb tsam qab teb rau sab hnuv tuaj, cov teb chaws Es Xias, As Fiv Kas, cov teb chaws pov txwv, thiab cov teb chaws nruab nrab sab hnuv tuaj. Tib neeg kis tau tus kab mob no mas yog vim tus neeg ntawd tau ua hauj lwm tu tsiaj los yog siv tej yam khoom uas ua los ntawm tsiaj los. Cov neeg ua hauj lwm hauv tej lub tsev hauj lwm tu tsiaj txhu los yog siv tsiaj txhu tej khoom uas ua los ntawm cov teb chaws uas keev muaj tus mob no mas lawv kuj yuav raug tau tus mob *B. anthracis* no thiab. Nyob hauv teb chaws As Mes Lis Kas no mas kuj tsis pom muaj tej tsiaj txhu raug tus mob no, thiab tsis tas li, yeej tsis tau muaj tib neeg tau raug tus mob no li.

### Tus mob anthrax no kis li cas?

Kuj muaj 3 txoj hau kev uas yuav kis tau tus mob no yam li, kis ntawm tawv nqaij, nqus tau, los yog nqos tau. Cov noob kab mob no yuav ciaj sia nyob hauv av ntev ntau xyoo. Thaum tej tsiaj txhu mus noj raug rau tej nroj tsuag uas muaj cov kab mob no mas cov tsiaj kuj kis tau. Tib neeg yuav kis tau tus kab mob anthrax no mas yog thaum lawv tu cov tsiaj muaj mob thiab tu tej khoom muab tsiaj ua uas kis mob lawm ces lawv yuav kis tau tus kab mob, los puas lawv nqus tau tus kab mob ntawm qhov ntswg mus. Yog noj cov nqaij tsiaj muaj mob thiab ua tsis siav mas kuj yuav kis tau tus kab mob no tib yam.

### Tus mob anthrax no cov tsos mob zoo li cas?

Yuav chiv mob li cas mas kuj yuav yog saib thaum kis ntawd kis li cas thiab. Feem ntau nyob hauv 7 hnuv thaum kis tas ntawd mas yuav pom tsos mob tshwm sim.

- **Kis ntawm tawv nqaij:** Tus kab mob yuav kis ntawm tawv nqaij yog hais tias tib neeg muaj nqaij to es ho tu tej plaub tsiaj, tawv tsiaj, tshwj xeeb tiag mas yog plaub tshis, ua cov tsiaj ntawd muaj tus kab mob. Thaum kis tas mas daim tawv nqaij yuav pib sawv pob thiab khaus zoo li kab tom ces 1-2 hnuv tom qab mas cov pob khaus yuav sawv hlwv ces qawj tab sis tsis mob. Yog ntsuas lub kaub puab mas nws yuav dav li 1-3 cm thiab hauv nruab plaw qhuav dub nciab. Cov qog ntshav nyob ze thaj tsam ntawd yuav o. Li 20% ua raug tus mob no yog tsis kho mas yuav tuag taus. Yog muab tshuaj tua kab mob kho mas yuav zoo tuaj tsis tuag taus.
- **Nqus:** Thaum nqus tau tus kab mob mas kuj yuav ua mob li khaub thuas. Ntau hnuv tom qab, mas cov tsos mob yuav ntxee mob hnyav zuj zus ces yuav ua tsis taus pa ces lub cev yuav mob hnyav tuaj. Yog nqus tau tus kab mob no lawm mas 1-2 hnuv tom qab pib mob ces kawg tuag xwb.
- **Nqos:** Thaum noj nqos tau cov nqaij uas muaj tus kab mob lawm mas tus kab mob yuav ua rau cov plab hnyuv quav mob o. Yuav pib xeev siab, tsis qab los, ntuav, kub cev thiab yuav mob plab, ntuav ntshav, thiab raws plab heev. Muaj li 25-60% cov neeg uas raug tus kab mob li no ces kawg tuag xwb.

### **Tus mob anthrax no puas kis tau ntawm ib tug neeg mus rau lwm tus?**

Tus kab mob no yuav kis tsis tau ntawm ib leeg mus rau lwm leej.

### **Ua li cas thiaj paub hais tias yog tus mob anthrax no?**

Yuav yog kuaj tus neeg mob saib puas muaj tus kab mob no hauv nws cov ntshav, los yog kuaj cov hlwv ntawm tawv nqaij, los yog tej hnoos qeev tom qa los yog kuaj nws tej roj ntsha tiv thaiv kab mob (antibodies) saib muaj li cas.

### **Yuav kho tus mob anthrax no li cas?**

Cov kws kho mob yuav muab tshuaj tua kab mob los kho. Feem ntau mas yuav siv cov tshuaj Penicillin, tab sis, kuj siv tau lwm yam tshuaj xws li cov tshuaj erythromycin, tetracycline, los yog chloramphenicol. Yuav kom kho tau zoo mas yuav tsum kho thaum chiv mob kiag thiaj li, yog tsis kho ces yuav ua mob hnyav thiab tuag taus.

### **Puas muaj tshuaj siv tiv thaiv tus mob no rau tib neeg?**

Tam sim no nyob hauv teb chaws As Mes Li Kas mas muaj ib hom tshuaj siv los tiv thaiv rau neeg. Tseem fww teb chaws no tau faj tias tsam yog muaj tej ntsug rog sawv uas yuav siv anthrax los mus lom neeg tau, li no mas Tseem Fww Feem Xyuam Fab Tub Rog thiaj tau siv cov tshuaj no los mus tiv thaiv rau lawv cov neeg ua hauj lwm thiab cov tub rog. Rau cov pej xeem xwb no ces cov tshuaj kuj yuav siv tau rau cov neeg uas lawv txoj hauj lwm yog tu tej plaub tsiaj (tshwj xeeb yog plaub tshis), qhauv pob txha, tw tsiaj uas thauj lwm teb chaws tuaj. Tsis tas li, kuj siv tau rau cov neeg uas lawv txoj hauj lwm yog los mus soj ntsuam kuaj txog tus mob no uas yuav yog ib txoj kev uas lawv yuav nphav tau tus kab mob no thiab. Cov tshuaj yuav siv tau rau cov neeg muaj hnuv nyoog 18 txog 65 xyoos xwb. Vim tsis paub meej tias cov tshuaj no puas yuav ua tau tib neeg tuag taus, li no mas cov poj niam cev tsis tab seeb yuav tsum tsis txhob siv cov tshuaj no. Yog txhaj cov tshuaj no tas mas 93% yuav tiv thaiv tau kev kis tus kab mob ntawm daim tawv. Cov tshuaj uas tsuas siv los txhaj tsiaj xwb mas tsis txhob muab coj los txhaj rau neeg.

### **Txoj cai siv cov tshuaj txhaj tiv thaiv tus mob anthrax no muaj li cas?**

Yuav txhaj koob tshuaj ntawm tawv nqaij mus rau hauv cov nqaij rog. Txhaj 3 koob sib ncuu li ob lub lis piam ces mam ho txhaj dua 3 koob ntxiv rau thaum 6, 12, 18 lub hlis tom qab. Yuav tsum tau txhaj txhua xyoo puag ncig thiaj yuav muaj cov tshuaj txaus hauv lub ces tiv thaiv tus mob no.

### **Thaum txhaj cov tshuaj tas puas yuav muaj mob dab tsi?**

Li 30% ntawm cov neeg uas tau txhaj koob tshuaj no tas mas kuj yuav ua rau qhov chaws txhaj ntawd mob, thiab o liab me ntsis. Yog txhaj rau tus neeg uas twb tau raug tus kab mob dua los lawm no mas kuj yuav ua rau thaj chaw txhaj ntawd mob hauj sim. Kuj tsis pom tias koob tshuaj ua tau mob hnyav, tab sis yog mob hnyav mas kuj pom tias yuav mob ntawm thaj chaw txhaj thiab yuav o taug sab caj npab ntawd. Tsawg tshaj 0.2% uas thaum txhaj tas es ho ua mob thoob ce xws li mob khaub thuas.